

Visoki predstavnik obavezao BiH da prati i provodi naloge o blokiranju računa osoba koje pružaju podršku osobama optuženim za ratne zločine



Visoki predstavnik, Miroslav Lajčák, danas je donio odluku kojom se osobama kojima su bankovni računi u BiH blokirani nalozima visokog predstavnika iz 2003. i 2004. godine omogućava da otvore po jedan novi bankovni račun. Ova odluka ni na koji način ne dovodi u pitanje sankcije protiv tih osoba koje su trenutno na snazi.

Odluka visokog predstavnika podrazumijeva da 35 osoba koje su još uvijek pod sankcijama koje je izrekao visoki predstavnik zbog njihovih veza sa mrežama podrške optuženima za ratne zločine sada mogu otvoriti po jedan račun na teritoriji BiH za uobičajene, svakodnevne transakcije. Njihovi računi koji su trenutno blokirani ostaju blokirani.

Nakon što budu otvoreni, nove bankovne račune pomno će pratiti Finansijsko-obavještajni odjel SIPA-e a sve sumnjive transakcije biće prijavljene i istražene.

Visoki predstavnik donio je ovu odluku nakon konsultacija i u koordinaciji sa Haškim tribunalom, kao i EUFOR-om, NATO-om, te bosanskohercegovačkim i entitetskim poreskim organima i tijelima za provedbu zakona.

Ovom odlukom efikasno se prenosi dio odgovornosti za praćenje i provođenje sankcija protiv imenovanih osoba na domaće

institucije, i na taj način zemlji daje prilika da dokaže svoju opredjeljenost da osigura punu saradnju sa Haškim tribunalom, što je uvjet iz Daytonskog mirovnog sporazuma.

Nedavno hapšenje Radovana Karadžića i Stojana Župljanina pokazuju da je moguće pronaći optužene za ratne zločine. Ratko Mladić mora biti uhapšen i izručen bez odlaganja a mreže podrške uništene. Ovom odlukom se osigurava da se očuva ravnoteža između imperativa da optuženi za ratne zločine budu izručeni pravdi, i poštivanja prava pojedinaca.

Odluka stupa na snagu osam dana nakon njenog objavljivanja u Službenom glasniku i ostaje na snazi sve dok Ratko Mladić ne bude izručen Hagu ili pak dok visoki predstavnik ne odluči da je promijeni.